

## **Chanadima Chamumbanda Lemeshaku Nzambi naMujimba Weyi**

Muwukwenzi (muwunsanda) weyi wukumona kutesha nankashi muchihandilu cheyi mwakudimona neyala. Hadaha mukwenzi wumu weyala wukuhosha nindi nakukenji, dichi wukulomba akami naneyi. Hela neyi hadaha chinleji chamuchima weyi chikukuleja nindi chatama kudimona neyala mwenimu henohu kanda winjili muwulu, hadaha wukwiteja kulonda wumutiyishi kuwaha. Kwikala namuchima wakukama naneyi henohu kanda akusumbuli, hichinchikijilu chakukena chalala tahindi? Nehi, owu mukwenzi weyala wudi nakukudimba, yena nakenji hohu akonjeshi mujimba weyi atiyishi kufwila kwindi kuwaha. Hefuku dikwawu wukukushiya alondeli chanadima mukwawu, nankashi neyi owu weyala wukutiya nindi eyi wudi nevumu.

Dichi mulonja wawusoku iwu wunamwekani neyi walema nankashi, twatela kwiluka netu muntwinyi wawulenjeli, dichi nawa wawulenjeli mulonjadi. Mukanda wajila waNzambi hichimwekeshu chikupu chaNzambi kudetu, dichi wunatwakuli mwalumbuluka hansanji iyi:

- a) Nzambi diyi Nlenji yaweyala nimumbanda. Yena nawukalawenu wawumbili mujimba weyala niwamumbanda, Kutachika 2:7, 22.
- b) Hohenohu Nzambi wenkeli mumbanda kudi iyala ekali chamukunkulu chasweja kulema, nakuyinunja hamu muwulu, Kutachika 2:22, 24.
- c) Wusoku wakudimona neyala hichibalu chalema chawulu, 1 AKorinda 7:3,4.
- d) Mulonja wawusoku wakudimona neyala wunafumi kudi Nzambi, wudi walubanji niwajila, Yishimu 5:18,19; AHeberu 13:4. Iyala namumbanda adinji nzekesi kumesu awumu namukwawu, ilanja hiyatiyili nsonyuku, Kutachika 2:25.
- e) Wusoku wakudimona neyala watela kubadika wusoku wakununja nyijimba yenu hamu hohu. Mwalala muwusoku wakudimona namfumweyi wukukolesha kukenja kweyi kwasweja kutoha hadi yena, nakumumwekeshela neyi wunadihani kudi yena chiwekala mwejima nakumwinka yuma yeyi yejima. Chinakoleshi nawa muchima weyi nikudihana kweyi kwakudinunja mwejima nindi bayi wachenjuku hanyaka yeyi yejima.

Dichi chinalumbuluki hatooka netu Nzambi walenjeli wusoku wakudimona neyala wumwekani muwulu hohu. Ilanga Satana (chilumbu chaNzambi) wukweti kufwila kwachenji. Mwanta Yesu watanjishili nindi Satana hintwambi nimbanji, Yowanu 8:44. Dichi neyi Nzambi nakuleji nindi kutiya kuwaha mwakudimona neyala chinja muwulu hohu, Satana wukukuteshanga nindi kudimona nakala weyala wunakenji. Anukaku neyi, kufwila kumu hohu kwaSatana hikukukisanga muwumi iwu wahanu heseki dichi hayanyaka nanyaka mwijiya dakesi.

Yuma yinasonji kukutwamba kwaSatana yinamwekani nankashi munyichidi yayivulu yanyisonju yinafumi kunshidi yawujila, sweje-e musonju waHIV/AIDS. Neyi antu analondi kuleja nikuleja kwaNzambi hawusoku wakudimona neyala, mutenowu nyisonju yeniyi yejima hiyinamwekanuku. Kulondela muchima waNzambi muchihandilu cheyi hinjila yasweja kuwaha yakudikinja kunyisonju yeniyi yejima. Dichi nawa wukudikinja kukukata kweneni nikukala kwakuvulu kwenzanja muyihandilu yawantu hamulonja wanyisonju yeniyi.

Chinja wutonjoki namaana nankashi hakudimona neyala henohu kanda winjili muwulu. Neyi iyala wumu nafwili akami naneyi, nankashi chinalumbuluki netu yena weyala nakami dehi nawambanda amakwawu, dichi watela kwikala namusonju wafumanga kuwujila hela musonju waHIV/AIDS. Bayi amwiteji akudimbuku mwakukonjesha ma“*condom*”, mulonja ma“*condom*” anatweshi kukanjanyanya kukukinja kunyisonju yayivulu, nankashi kumusonju waHIV/AIDS. Eyi watela kwiluka nakashinshi neyi, mulonja wudi mumbanda chaswayi hadeji kutambula nyisonju yeniyi kubadika amayala. Anukaku neyi kudimona kamu hohu neyala henohu kanda winjili muwulu chinatweshiki kukukisanga hanyaka yeyi yejima yahanu heseki! Kukata ninyisonju yikufuma kukukonja iku kumu hohu hiwakatweshi kuyibalumunaku. Hadaha nawa wakekala nevumu henohu kanda wudilonjeshi hansanji iyi yasweja kulema, dichi wakakanjanyanya kuhemba chachiwahi mukeki.

Ambanda amavulu anatonjoki nawu chinja adimonanga neyala henohu kanda enjili muwulu eluki nawu anatweshi kuvwala anyana. Hikutwamba kukwawu kwaSatana. Mulonja kudimona neyala henohu kanda winjili muwulu hadaha wukutambula musonju wumu wakakukanjesha kuvwala anyana hanyaka yeyi yejima! Anukaku neyi, Nzambi diyi wenkanga anyana, Masamu 127:3, hiyafumanga kunovu jeyuku.

Hadaha wukwihula lwihi lwasweja kulema neyi, chikutweshika njahi chanadima adijiliki henohu kanda enjili muwulu? Dimu hichuma chasweja kukala nankashi, dichi kwilamu munovu jeyi wukukanjanyanya. Chinja

nakukwasha kwaNzambi hohu wukwimika mushindu munjita yeniyi yasweja kutoha. Anatuleji muAEfwesesa 6:10-13 nawu chiŋa twikali akwaŋovu mudi Mwanta kulonda twimani mwifuku datama. Nzambi nakeŋa kukwasha mujinjila jeniji:

1. Chiŋa wuwwaliki muchisaka chaNzambi dichi kutambula kudi yena chisemwa chachiha. Eyi wawwalikili mukayi iku nachisemwa chanshidi. Chinakwilishi nduŋu yanshidi, dichi wuduŋu iwu wamwekanaŋa muchihandilu cheyi. Anatuleji muARoma 8:7,8 nawu yitoŋojoka yachesemwa yadikaŋaŋa naNzambi hiyamutiyishaŋa Nzambi kuwahaku. Chiwukwiluka neyi chihandilu cheyi chanshidi chidi nakukulombolaŋa kukusompesha kwaNzambi kwahayanyaka, wukufwila nankashi kuchishiya. Ilaŋa wudi nduŋu dichi wunabuli ŋovu yakudibalumuna. Henahana kushinshika kukala kweyi kwejima wukubilela kudi Nzambi akutiyaŋi luwi nakukwamwina, Matewu 14:30.

Chiwukulomba Mwanta Yesu akwamwini nikwikala Mwanta wachihandilu cheyi, wukumona kuvwalika chachiha, 2 AKorinda 5:17; Yowanu 5:24. Nzambi wukukwinka chisemwa chachiha, dichi nawa wanta nimuchima wakumutiyishaŋa kuwaha, 1 Yowanu 3:9; 2 AKorinda 5:9.

2. Kwiluka nakashinshi neyi Nzambi nakeŋi nindi wudijiliki henohu kanda wiŋili muwulu, 1 ATesalonika 4:3-7; ARoma 12:1, 2. Dichi wukudihana nankashi wovwahili kuleja iku kwalema.

3. Kwiluka nakashinshi neyi muloŋa wudi mukwaKristu, mujimba weyi hiweyeyi wakukoŋesha mwaya muchima weyuku, wambala waNzambi, 1 AKorinda 6:18-20.

4. Kulomba kudi Nzambi hefuku hefuku akukiŋi nakukuhemba mukujila kweyi. Masamu 16:1.

5. Kusweka mazu aNzambi mumuchima weyi, chikukuhemba kukutesha kwakudimona neyala, Masamu 119:9-11.

6. Kufuma kukuvwalika kweyi kwahanu heseki, Nzambi nakwinki kujila kweyi kulonda wuchihembi chikali iheta deyi dasweja kulema dakumwinka mukwetala deyi. Hiwukwikala namuchima wakumwinka wacheŋi iheta deniduku. Kudinka kudi mfumweyi chakakolesha nankashi neyi wunakeŋi yena kubadika amayala ejima.

7. Kukolesha wubwambu nawayaŋadima awa anakeŋi kuhemba kujila kwawu nawa, 1 AKorinda 15:33.

8. Bayi wikalaŋa neyala kanka wenu mpinji yayilehuku.

9. Kubula kuyaŋa kumaluŋa kwekalaŋa kutesha kwakudimona neyala, dichi nikubabala hayuma yiwukutaŋa nikutala.

Neyi kunyima wakaŋenyi kwiluka nakashinshi kulema kwakujila kweyi, chachiwahi nankashi kutachika mwamwiha lelu. Chiwukubilela kudi Nzambi akwamwini, yena wukutookesha nshidi jeyi jejima jakunyima, Isaya 1:18; AHeberu 10:17.

Neyi wudi mukwaKristu, kudijilika henohu kanda wiŋili muwulu hinjila yasweja kulema yakumwekesha neyi kukuhwelela kweyi mudi Nzambi kwakweni, Kutachika 39:7-9. Chikuleta nawa nkisu muchihandilu cheyi chahanu heseki nachihandilu chakamwekana mwiwulu, 1 Timotewu 4:8. Neyi wukumulemesha Nzambi mumujimba weyi henohu kanda wiŋili muwulu, yena wakakwinka wusoku wasweja kuwaha namfumweyi chiwakenjila muwulu.

Ilaŋa anukaku neyi wujila hiwukuleta kukata ninyisoŋu nikukala mwamuvulu hohuku, nankashi wukuleta kusompesha kwaNzambi muchihandilu cheyi, AHeberu 13:4. Nzambi nahoshi nindi akwawujila hiyakaswana wanta waNzambuku, 1 AKorinda 6:9.

Eyi wukwiladi nakujila kweyi? Kulondela walala waNzambi tahindi kutwamba kwaSatana? Hikutonda kweyeyi, ilaŋa watela kwiluka neyi chikukuletela nkisu jaNzambi hela kusompesha kwaNzambi muchihandilu cheyi. Bayi mudidimbaku, Nzambi hiyamusehaŋaku. Yonsu yakudimayi muntu diyi yakaŋulayi, ADalija 6:7.